

輟耕錄卷第十

御史五常

周景遠先生馳名能文。爲南臺御史時。分治過浙省。每日與朋友往復。其書吏不樂。似有舉刺之意。大書壁上曰。御史某日訪某人。某日某人來訪。御史忽見。呼謂曰。我嘗又訪某人。汝乃失記何也。第補書之。因復謂曰。人之所以讀書爲士君子者。正欲爲五常主張也。使我今日謝絕故舊。是爲御史而無一常。寧不爲御史。不可滅人理。吏赧服而退。

官倉入粟

今官府收斂秋糧之際。比先涓吉啓倉。於青龍方敷。入粟六石六斗六升六合以應日。蓋國家初無定制。不知各處何以一皆如此。予意必取上下四方六合之意耳。

食物相反

凡食河豚者。一日內不可服湯藥。恐內有荊芥。蓋與此物大相反。亦惡烏頭附子之屬。予在江陰時。親見一儒者因此喪命。其子尤不可食。能使人脹死。嘗水寢試之。經宿。顆大如茶實。世傳中其毒者。亟飲穢物乃解。否則必亡。又聞不必用此。以龍腦浸水。或至寶丹。或橄欖。皆可解。後得一方。用槐花微炒過。與乾燕支各等分。同搗粉。水調灌。大妙。